

GALESIYA Pol Galesiya Binib Kilop Mij Tikak

¹ Yad Pol, bi Jisas takaw nop dad ameb ak midebin. Pen wog gipin anib ak, binib oginap agel akan, bi olap ne agek ma gipin. Jisas Klays sek, Nap nop gek tepayan tikjakak ak sek, kili apilminal ke agel gipin.

² Yad ayip mam oginap yad ayip Klays yil midobun okok, chin mij anib ak nu kil tikil, nibop Klays binib ne Galesiya plopens pelpel apnan gipim ak nobun.

³ Bapi God chin ayip Biawl Jisas Klays ayip, apilminal ak nibop yimug ninid gitep gel, midtep ginimib.

⁴ Klays ne Bapi God gos pal ak ninid kidek gak. Ne kumil, gach chinop tig walig giyokak. Giyokil chinop dek, chin tap timel lum awl mideb ak ninid ma ginigun.

⁵ Anib ak God yib nop ak pel pelnep dad aplanigun. Yaw.

Klays takaw teplep ak nep niginigun

⁶ Yad gos pal awl yibil nepin. Klays nibop yimug ninid gitep gek, God nibop suk agek binib ne midebim. Pen kasek God nop keligil, takaw anib ak ke takaw teplep agil nepim.

⁷ Pen takaw anib ak, Klays takaw teplep ak mel. Bi oginap apil, Klays takaw ak keligil, takaw

1:1 Gal 1.11-12 **1:3** Lom 1.7, Plp 1.2 **1:4** Lom 4.25, Gal 2.20,
1 Ti 2.6, Tat 2.14, Hib 2.5, 1 Jo 5.19 **1:7** Apo 15.1, 15.24, 2 Ko 2.17,
11.4, 11.13

anib ak ke apal. Anib apal, Klays takaw teplep ak agobun apal pen, takaw yepis apal. Takaw yepis anib ak agel nepim.

⁸ Klays takaw teplep nibop agñinok ak, takaw niñid yibil ak agñinok. Pen chin takaw teplep anib ak ke agonigabun, mab ke yineb ayan pisnep amnigun. Akan ensel God man ne alañ nib olap apil, takaw teplep anib ak ke agenigab, mab ke yineb ayan pisnep amnimun. Takaw anib okok takaw yepis.

⁹ Chin pen takaw anib aginok ak, miñil abe yad takaw nokom anib nep agebin. Bi oginap apil nibop takaw teplep anib ak ke agenigabal, mab ke yineb ayan pisnep amnigel.

¹⁰ Yad takaw anib ak agen, bi oginap yip gos teplep niginigabal akan? Mel. God ne ke yip gos teplep niginigab agil gos nepin. Yad bi oginap kilop takaw ñig ma lipin. Yad anigil apinap ak, Klays nop wog giñeb ne ak ma yebinep.

God Pol nop dek, takaw teplep ak binib okok agñi ajoligup

¹¹ Mam sikop, yad nibop niñid agebin. Takaw teplep nibop aginek ak, binib oginap gos niñid agel ma aginek.

¹² Pen bi olap takaw ne yip agñek niñid ma aginek. Jisas Klays yip gos ñek, nibop agñinek.

¹³⁻¹⁴ Pen yad geligipin adek ak, nib nepim. Klays nop takaw ak ma dil, based sikop takaw ak dil,

1:8 1 Ko 16.22 **1:9** Lo 4.2, Snd 30.6, Lep 22.18-19 **1:10** 1 Te 2.4, Jem 4.4, 1 Jo 3.19 **1:11** Mat 16.17, 1 Ko 15.1 **1:12** 1 Ko 15.1-3, Gal 1.1, Epe 3.3 **1:13-14** Apo 8.3, 9.1, 22.3-5, 26.9-11, Plp 3.6, 1 Ti 1.13

kiles yibil geligipin. Bi Juda yad ayip jimñil awl ginok okok, kilop ned gil, based sikop ned geligipal ak yad kiles gil deligipin. Bi Juda gos kili pal ak kidek gil, Klays binib ne okok kilop gi timel yibil gil, ñag paklinig geligipin.

¹⁵ Pen ami yip ma tikak ñin ak, God ne yimug niñid gitep gil, yip Jisas bi takaw nop dad ameb ak aglak. Kidek yad awl gen, God ne aglak ñin ak apek, yip Ñine yomak.

¹⁶ Ñi yad Jisas, Pol nop yomen nigtep gil, kidek binib Juda mel okok kilop takaw telep ak agñi tep ginigab agil, yip Ñine yomek nigtep ginek. Anigek, Jisas takaw ak taydil tek mideb agil, binib oginap ma agniginek.

¹⁷ Bi ned Jisas takaw nop dad ameb okok, Jelusalem yelak, kilop niginig ma amninek. Anib ñin ak nep, man pal awl Alebiya am midil, adikid apil taun Damaskus yeligipin.

¹⁸ Sub ominal nokom midil, kidek Pita Jelusalem yek ak niginig amil, nod ayip ñin kunay ma yenek. Ñin anep ajip pis kid ak yenek.

¹⁹ Pen yad bi Jisas takaw nop dad ameb oginap ma niginek. Pita ayip, Jisas nimam Jemis ayip kilop nep niginek.

²⁰ Takaw ñu kil tikebin anib awl, God nig mideb ak, nibop yepis ma agebin. Niñid yibil agebin.

²¹ Pen kidek Siliya plopens amil, Silisiya plopens amil ginek.

1:15 Ais 49.1, Jer 1.5, 49.1, Apo 9.15, Lom 1.1 **1:15** Apo 9.3-6, 22.6-10, 26.13-18 **1:16** Lom 11.13, 2 Ko 4.6, Gal 2.7 **1:18** Jon 1.42, Apo 9.26-30 **1:19** Mat 13.55 **1:21** Apo 9.30

²² Klays binib ne pelpel apnan gipal okok, Judiya plopens man sikol keke midebal okok, anib ñin ak jomulik yip ma nigilak.

²³ Binib oginap pen takaw yip ak yig dad amil agilak, Bi Jisas nop takaw ak agjuwil, chinop gi timel yibil gil ñag paklinig goligup ak, miñil Jisas takaw teplep ak binib okok kilop agñi ajeb agilak.

²⁴ Niñid, God yib nop ak dad aplanilak.

2

Pol ne bi Jisas takaw nop dad ameb oginap ayip takaw ag jimñil lipal

¹⁻² Pen mid dad amil, sap yeb anep wajilem pis kid ak lek, God yip gos ñek, mam Banabas ayip adikid Jelusalem amnikok. Taytus ayip amnikok. Amil, biawl Jisas nop nigilak okok ayip, am wakay olap besigil, kili tay tek aginigel agil kilop aginek, Binib Juda mel okok kilop Jisas takaw teplep anib ak agñibin aginek. Yad anigil gos niginek, wog miñil gipin ak abe bilel ginek abe pisnep ma yownimun agil niginek.

³⁻⁴ Biyad Taytus, ne Juda mel, bi Glik nib ak pen, bi Juda oginap kili Jisas yib nop agil yepis apal okok, kili kimigel apil chin ayip wilikun agilak, Taytus wak tibilikil, chin Juda binib gipun adek ak nep ginimun agilak. Anib agel, chin takaw anib ak ag amil apil gil, takaw yad ak niñid lek, yad ayip biawl Jisas nop nigilak okok ayip chin aginok, Wak ma tibilikinigab aginok. Bilel chin takaw Mosis ñu kil tikak ak kidek gon, chinop nag

lek tek yoligup. Pen Jisas apil chinop gek, chin nag lup anib ak keligil, miñil midtep gipun. Pen bi anib okok chinop tepayan dil nag lun agil agilak, Nibi Mosis takaw ak kidek ginimib agilak.

⁵ Chin pen nibop binib Juda mel okok gos niñid, Jisas takaw teplep niñid yibil ak nep dinigel agil, takaw kili agilak ak ma nep dinok.

⁶ Bi Jisas nop nigilak okok, bi anib okok tek, biawl aginigabal ak pen, God nigup yad abe nepin, kili nep anib aginigabal. Pen biawl anib okok, binib okok kilop anigil agñinimin agil, yip ma agilak. Yad Jisas takaw agñibin tek niñid anib agilak, Nim agup ak agilak.

⁷⁻⁸ God Pita nop wog ñek, Jisas takaw nop dad amil Juda binib okok kilop agñi ajup tek, yip abe wog ñek, Jisas takaw nop dad amil binib Juda mel okok kilop agñi ajipin. Anib ak niñid nim agilak, God Pita nop wog ñek, Juda binib okok kilop takaw teplep agñi ajup tek, Pol nop abe wog ñek, binib Juda mel okok kilop takaw teplep agñi ajup agilak.

⁹ Jemis, Pita, Jon kilop biawl apal ak pen, kili God yip wog anib ak aglek nigilak tek, wog chin adek nokom gipun agil, Banabas chilop ñin pak sakilak. Anigil takaw ag adek nokom lil aginok, Banabas chil binib Juda mel okok kilop God takaw agñinigabal, nibi Juda binib okok kilop agñinimib aginok.

¹⁰ Pen kili takaw nokom olap agil agilak, Am man anib okok ajil, binib Jisas nop dipal okok kilop agenimil, binib yimgeptek man Juda awl midebal

okok kilop sawl ma gil, kilop mani oginap ñinigel agilak. Takaw agilak anib ak, yip tep gak adek ak nep agilak.

Pol Pita nop ag gup

¹¹ Pen kidek taun Adiyok am midonok ñin ak, Pita apil, nop neben sijnak apil ag ginek.

¹² Taynen? Ne ayip Juda binib oginap ayip ned binib Juda mel nab okok midil, binib Jisas nop chigilak okok ayip, tap jimñil ñiboligup. Pen Jemis bine oginap Jelusalem nib owlak okok, yip aginigabal, Taynen nad bi wak ma tibilikipal okok ayip tap ñibeban aginigabal agil, ne pilikil ke sijnadan yek, Juda mel okok kili ayip jimñil ma yek.

¹³ Anigek, Juda binib ned ju am man Adiyok yelak okok, Pita yepis gak anib ak ninid, abe gilak. Pen mam Banabas abe ninid, kili gilak adek anib ak kidek gak.

¹⁴ Pen Jisas takaw teplep ninid yibil ak anigil keligelak, binib okok nig midilakninq, Pita nop aginek, Nad bi Juda nib ak pen, binib Juda mel okok tek yeligipan aginek. Pen miñil taynen nad ke asik lil, binib Juda mel okok kilop chin Juda kay gipun tek ginimib agil ageban aginek?

Binib Jisas nop gos liniginigabal okok, binib suntep ne yenigabal

¹⁵ Chin Juda binib yipid gil okok, binib Juda mel okok yokip okok tek ma midobun.

¹⁶ Anib ak chin nopun, takaw Mosis ñu kil tikak ak gon amek, God nigek binib suntep ne

okok ma midobun. Chin binib Jisas Klays nop gos linopun okok nep, God nigeek binib suntep ne okok midobun. Pen binib takaw Mosis ñu kil tikak ak gel amnigab okok, God ne binib suntep yad agil ma aginigab.

17 Chin Klays nop gos linopun ak, God nigeek binib suntep ne okok midobun. Anigon, Juda binib kili takaw apal, Nibi binib gach sek, Juda mel okok tek midebin apal. Anib ak tek, chin agonigun, Klays ne ke gek tap si tap timel gonigun akan? Mel yibil. Anib ma yibil agonigun.

18 Yad takaw Mosis ñu kil tikak adek ak keligil, kidek pen tepayan kidek gilig, tap timel geligipin adek ak amil, God takaw nop ak tibilikipin.

19 Pen takaw Mosis ñu kil tikak ak yad keligen, takaw anib ak yip nigeek, bi kumeb tek midebin. Miñil Mosis takaw ak muk okok ma midebin. Anib ak pisnep keligil, God ayip midebin.

20 Klays yip mapen lil chib niñid kumek nop chigil nim, ne kumak ak yad ayip kumilok tek lup. Yad miñil konim yibil midil, yad ke ma kod midebin, Jisas ne ke yip kod mideb. Ned yeligipin tek ma midebin. God Ñine nop gos linigilig, yip gos ñub adek ak nep gipin.

21 Pen takaw Mosis ñu kil tikak ak nep niñid, God binib suntep ne okok midobinop, God agek Klays chinop nen ma kubikop. Mosis takaw ak gil, God ayip jimñil yonigun tek ma lek, chinop yimug niñid gitep gil, Ñine nop agek apil, chinop nen kumak. Anib ak nop chinop nen kumak takaw teplep ak,

2:17 1 Jo 3.8-9 **2:19** Lom 6.11, 6.14, 7.6, 2 Ko 5.15, 1 Te 5.10, Hib 9.14 **2:20** Jon 13.1, Lom 6.11, Gal 1.4, Epe 5.2, Tat 2.14, 1 Pi 4.2
2:21 Gal 3.21, Hib 7.11

yad ma keliginigayn.

3

Mosis takaw ak kidek gipun akan, Klays nop gos linopun akan?

¹ Galesiya binib. An agek nibop sawl sek lup? Chin Jisas Klays nop mab bak alañ chipil pak tibik lel kumak takaw tep ak, nibop agñi tep gon nepek ak pen, nibi apim, Mosis takaw ak kiles timel geligipal tek nep gil, God binib ne yonigabun apim. Tay gek anib apim?

² Pen yad nibop takaw nokom olap agniginigebin. Nibi ned tay gem, God ne Kawnan ne ak nibop yokak? Mosis takaw ak nigem nibop ma yokak. Takaw tep nibop agñinok ak nep ninid gos linigem, nibop yokak.

³ God Kawnan ak nop dil nim, binib suntep ne okok midebim ak pen miñil sawl sek lek, chin ke kiles timel gil midtep ginigabun agil gebim.

⁴ God Kawnan ne ak tap teplep ak gek nepim. Tap anib ak gos ak sawl gipim akan? Pen yad nepin, nibi gos anib ak sawl ma gipim.

⁵ Yip agem nigin. Takaw Mosis ñu kil tikak ak gem ninid, God ne Kawnan ne ak nibop yokil, tap mageptek gek nepim? Mel. Nibi takaw teplep ninid gos linigem, God ne Kawnan ne ak nibop yokil, tap mageptek gek nepim.

⁶ Buk Baybol ak tikil agilak, God ginigayn agil aglak takaw ak, Eblaham ne God nop gos linigek God agak, Eblaham bi suntep yad agak agil tikilak.

3:1 Gal 2.13-14, 5.7 **3:2** Apo 10.47, 15.8, Lom 10.16-17, Hib 6.4

3:3 Gal 4.9, Hib 7.16, 9.10 **3:4** Hib 10.35-36, 2 Jo 8 **3:6** Stt 15.6, Lom 4.3, Jem 2.23

7 Anib ak nigim. Binib Klays takaw teplep ak niñid, niñid agup agil dipal okok, Eblaham ñapay ne yibil midebal.

8 Bilel God ne anigil nigak, kidek binib Juda mel okok Jisas takaw teplep ak gos liniginigel, yad nigen binib suntep yad okok yenigabal agil gos nigak. Nigek, buk Baybol kil tikil Eblaham nop takaw teplep won ak anib agak, God nep niñid, binib okok midupsek gek tep ginigab agak.

9 Anib ak binib Klays takaw teplep nop ak niñid, nop gos liniginigabal okok, Eblaham God nop gos liniñid am ne ayip midtep gup tek, am midtep yenigabal.

10 Pen binib takaw Mosis ñu kil tikak ak gon, chinop binib suntep agil dinigab apal okok, God kilop gi timel yibil ginigab. Taynen? Buk Baybol ak tikil agilak, Bi olap takaw Mosis ñu kil tikak tek midupsek kidek ma ginigab ak, God bi anib ak nop gi timel yibil ginigab agil tikilak.

11 Pen takaw olap tikil agilak, Binib God nop gos linepal okok nep nim, God nigek binib suntep ne okok midtep yibil ginigabal agil tikilak. Anib ak chin nopun, binib Mosis takaw ak nep niñid gel amnigab okok, binib suntep ne ma midel, kilop dinimun tek ma linigab.

12 Binib kili Mosis takaw ak niñid kidek gipal ak, God nop gos linigep mel. Mosis takaw ak niñid gipal ak, buk Baybol pen tikil agilak, Kili Mosis

3:7 Jon 8.39, Lom 4.11-12, 4.16 **3:8** Stt 12.3, 18.18, 22.18, Apo 3.5, 3.25, Lom 9.17 **3:9** Lom 4.16 **3:10** Lo 27.26, Jer 11.3 **3:11** Hab 2.4, Lom 1.17, Gal 2.16, Hib 10.38 **3:12** Wkp 18.5, Neh 9.29, Lom 4.4, 10.5, 11.6

takaw okok midupsek kidek gil nim, midtep yibil ginigabal agil tikilak.

¹³ Pen chin takaw Mosis ñu kil tikak ak midupsek kidek ma gil, God chinop gi timel yibil ginigab. Klays pen chinop dil agak, Yad tep kilop ak dil, bi timel tek olap miden, yip gi timel yibil ginimuñ agak. Buk Baybol ak tikil agilak, Bi mab bak alañ chipil pak tibik lel kumub okok, God kilop gi timel yibil gup agil tikilak. Anib ak chin nopun, chin yul awl dinig gon, Klays tep chinop ak dil, yul awl anib ak dil kumak.

¹⁴ Pen Klays kumak ak, binib Juda mel okok kilop abe dinig kumak. God Eblaham nop takaw aglil agak, Yad gen nad midtep gil, binib lum okok midupsek abe midtep ginigabal agak. Anib ak nep, Klays Jisas chinop nen kumak nim, nop gos linijid kod midon, God ne Kawnan ne ak yokek apil chinop bak lup.

*God ginigayn agil aglak takaw ak olap mideb,
Mosis takaw ne ak olap mideb*

¹⁵ Mam sikop. Yad nibop takaw olap agin. Bi oginap takaw ag adek nokom lil, apal tek nep gipal. Bi olap takaw oginap sek tepayan ma aginigab. Bi olap ap tibilikil monmon ma ginigab.

¹⁶ Anib ak tek, God Eblaham ayip ñine ayip kilop ginigayn agil aglak takaw ak, kidek takaw olap ke ma aginigab. Pen takaw aglek, buk Baybol tikilak ak, Ñapay okok agil ma tikilak. Ñapay nokom ak agil tikilak. Ñapay nokom agilak anib ak, Klays nop nep agilak.

3:13 Lo 21.23, Lom 8.3, 2 Ko 5.21, Gal 4.5 **3:14** Ese 11.19, Jol 2.28-29, Sek 12.10, Apo 2.33 **3:16** Stt 12.3, 12.7, Apo 7.5, 17.7, 1 Ko 12.12

17 Pen yad agebin ak, God Eblaham nop ned takaw ag adek nokom lil agak ak, pisnep aglak. Takaw anib ak, sub 430 kunay nep midil, takaw Mosis ñu kil tikak ak kidek agilak. Pen God takaw ne ned nib ginigayn agil aglak ak ma keliginigab. Takaw ned aglak ak pisnep agak.

18 Chin takaw Mosis ñu kil tikak ak kidek gon, God chinop denigab, God ginigayn agil aglak ak tap yokip tek lup. Pen Eblaham Mosis takaw ak nigeke, God nop ma dak. God nop ginigayn agil aglak tek dak.

19 God Eblaham nop yokip dak, anib ak taynen God ne Juda binib okok kilop takaw Mosis ñu kil tikak ak agñak? God ne tap si tap timel gipal okok misen lan agil, anigil agñak. Pen ne agak, Mid dad amil anib ñin ak, ginigayn agil aglinek tek, Eblaham tikek tik dad amil tikinigab ñi ak ownigab agak. Pen God takaw ak ensel okok nep dad apil, Mosis nop agñelak, Mosis nod pen binib okok kilop ñu kil tikil agñak.

20 Bi oginap takaw agnig, bi nab nib kili olap ayip aglipal. Pen God ne ke apil, Eblaham nop aglak.

Takaw Mosis ñu kil tikak ak chinop bi nap adik tek kod mideb

21 God takaw adek ominal agak ak, olap takaw Mosis ñu kil tikil agak takaw ak, olap God Eblaham nop ginigayn agil aglak takaw ak. Pen takaw ominal anib ak penpen ma gipil. Mel yibil. Binib suntep yenigel agil Mosis takaw olap agobikop, kili

3:17 Kis 12.40, Lom 4.13-14, Gal 3.21 **3:18** Lom 4.14, 8.17, 11.6

3:19 Lo 5.5, 5.22-27, Jon 1.17, Apo 7.38, 7.53, Lom 5.20, Hib 2.2

3:20 Lom 3.29-30 **3:21** Lom 8.2-4

Mosis takaw anib ak kidek gil konim amel, midtep gipikop. Pen Mosis takaw anib ak kilop gek midtep ginigel tek ma lup.

²² Buk Baybol tikilak tek nep mideb. Chin binib man okok midupsek tap si tap timel adek ak gon gon, gach anib ak chinop nag lek, ke konim amnigun tek ma lup. Pen binib Jisas Klays nop gos liniginigabun okok, God ginigayn agil aglak tek gil chinop dinigab.

²³ Pen Klays ma owak nin ak, nop gos ma liniginok ak nim, Mosis takaw ak chinop di nag lek tek goligup.

²⁴ Anib ak Mosis takaw ak chinop bi nap adik tek kod midil mid dad apek, Klays apek nop gos linigon, God nigeek binib suntep ne okok midobun.

²⁵ Klays chinop agil owak tek nop gos linigid nim, miñil takaw Mosis nu kil tikak ak chinop bi nap adik tek ma kod mideb.

Chin Klays Jisas nop gos linigon, ne gek God ñapay ne midobun

²⁶ Nibi Klays Jisas nop gos linigem, ne nibop midupsek gek God ñapay ne midebim.

²⁷ Nibi ñig pakil Klays nop chigil, chech kideyil ne tek ak lipim.

²⁸ Anib ak Juda jii ak ke, Juda mel jii ak ke ma midobun. Binib wog giñeb biawl olap muk okok midebal okok ke, binib wog gep biawl olap muk okok ma midebal okok ke ma midobun. Bin jii ak

3:22 Lom 3.9-19, 3.23, 4.11-12, 4.16, 11.32 **3:23** Gal 4.3 **3:24** Apo 13.39, Lom 10.4, Gal 2.16, Kol 2.17, Hib 9.9-10 **3:26** Jon 1.12, Lom 8.14-16, 1 Jo 3.1-2 **3:27** Lom 6.3, 13.14 **3:28** Jon 10.16, Lom 10.12-13, 1 Ko 12.13, Epe 2.14, Kol 3.11

ke, bi jij ak ke ma midobun. Chin Klays Jisas binib ne midobun tek, jij nokom yibil midobun.

²⁹ Klays yil midobun tek, Eblaham binib jij ne nokom midobun ak nim, God Eblaham nop ginigayn agil aglak tek chinop ginigab.

4

Klays ne gek God ñapay ne midobun

¹ Takaw yad apin ak anigil mideb. Bi tap kunay mideb ak, tap ne okok midupsek ñapay ne ak nop ñinig aglup. Ñapay anib ak tap midupsek mideb ak pen, ne sikol midek, tap ne ma mideb tek lup.

² Pen bi kili ñapay anib ak nop kod midebal okok, anib ginimin agil ag dad amil, nap aglak ñin ak apek nep, tap ne anib okok dup.

³ Chin abe ñisikol tek yoligipun ñin ak, chip day, kicheki, tap anib okok midupsek takaw agilak ak niñid, binib wog giñeb kili tek yoligipun.

⁴ Pen God ne ke aglak ñin ak apek, Ñine nop agek, apil bin olap nop nab ayan amek, nop tikak. Tikek, ne Mosis takaw adek ak nig midil, mid dad amek,

⁵ binib takaw Mosis ñu kil tikak ak nig midil, mid dad abal okok, kilop adikil dup. Gek, chin God ñapay ne ak midobun.

⁶ Nibi ñapay ne yibil midebim tek, ne Kawnan ne ak yokek apil, chinop bak lup. Bak lup ak nim chin apun, Apa, Bapi apun.

3:29 Lom 4.13, 9.7, Gal 4.7, 4.28, 5.1, Epe 3.6, Hib 11.18 **4:3** Gal 2.4, 3.23, Kol 2.20 **4:4** Stt 3.15, Mat 5.17, Luk 1.31, Jon 1.14, Lom 1.3, Epe 1.10, Hib 2.14 **4:5** Mat 20.28, Jon 1.12, Gal 3.13, Epe 1.5-7, 1 Pi 1.18-19 **4:5** Lom 8.15-17 **4:6** Lom 5.5

7 Anib ak nibi binib kicheki wog giñeb yokip tek geligipim okok, miñil God ñapay ne midebim. God ñapay ne midil, tap teplep ne dinigabim.

Pol Galesiya binib kilop niñid gos awl yibil nigup

8 Bilel nibi God nop gos ma nepek ñin ak, binib kicheki wog giñeb kili tek geligipim. Tap anib okok God niñid yibil mel.

9 Pen miñil God nop gos nigtep gipim. Nibi pen nop niñid ma dipek, ne ke nibop niñid dak. Anib ak tek, taynen nibi takaw Mosis ñu kil tikak ak niñid, wog giñeb ne okok tek midebim? Bilel chip day, kicheki, tap anib okok kidek geligipim tek, miñil adikid apil kidek gebim. Takaw Mosis ñu kil tikak ak ayip chip kicheki waljpal anib okok ayip, kili kiles ma midebal.

10 Pel ñin awl apal ak nep niñid, takan awl apal ak nep niñid, sime awl gep apal ak nep niñid, sub awl apal ak nep niñid gipim. Nibi takaw Mosis ñu kil tikak ak kidek gipim ak nim, ñin awl anib ak niñid anib apim, Kidek chin midtep ginigabun apim.

11 Nibop takaw tep agñen nepek ak pen, miñil keligipim tek lek, nibop gos kunay nigebin.

12 Mam ay sikop. Yad nibop chib niñid takaw kiles timel agebin, Yad midebin tek midem agebin. Ned takaw Mosis ñu kil tikak ak nigeligipin ak keligil, nibi yokip yeligipim tek yenek. Yad nib ayip yenek ñin ak, yip ditep yibil gipek, tap olap yip ma gipek.

4:7 Gal 3.29 4:8 Lom 1.25, 1 Ko 8.4-6, 12.2, Epe 2.11-12, 1 Te 4.5

4:9 Lom 8.3, 1 Ko 8.3, Kol 2.20, Hib 7.18 4:10 Lom 14.5, Kol 2.16

13 Nib nepim, yip miñak gak ak nim, man nibi ak midil, nibop takaw teplep ak ned agñinek.

14 Midtep ma ginek anib ak, yip yilik niñid kud ma ñibek. God ensel olap akan, Klays Jisas nep agil dipal tek yip dipek.

15 Yip dipek miñmiñ adek anib ak, miñil dam yokipim akal? Am nib ayip yenek ñin ak, gos miñmiñ nibi adek ak yad yil yek. Yip gitep yibil gil, widin midup nibi okok tig ju yip ñeb tek lek, monmon tig ju ñinimib tek ak midebek.

16 Pen miñil yip taynen keligipim? Takaw niñid aginek adek ak niñid, milik nepim akan?

17 Bi anib okok nibop takaw ñig lil, gos teplep nibop giñun agil gos ma nepal. Mel. Anigil tig asik yip ke lil nibop ke lil lun agil anigipal ak, gos chinop niginimib agil anigipal.

18 Yad nib ayip midil akan, pal okok miden, bi oginap nibop gos ñenigabal, tep ginigabal. Ak pen chinop kidek gilan agil anigipal ak, tep ma gup.

19 Pen ñapay yad okok. Klays nop chigil, ne mideb tek yenimib agil gos nepin. Anib ak tek, bin okok ñapay tikinig gel miñel yibil gup tek gak ak, miñil yip tepayan anigil geb.

20 Nib ayip midebinep ak, takaw akal dil aginim agil nepinep ak pen, pal okok midebin tek, gos nigen tekid di yowup.

Haga ayip Sala ayip kilop takaw pal adan lup

21 Pen nibi takaw Mosis ñu kil tikak ak nep nigobun apim okok, Mosis takaw ak tikilig agilak takaw ak ma nepim tek lup.

22 Takaw anib ak tikil agilak ak, Eblaham ñi omiñal tikak. Ñine olap, bin olap apil bin ne nop wog giñoligup ak nop dil tikak. Ñine olap, bin ne ke yibil ak ayip tikak.

23 Bin wog giñoligup ñi tikak ak, ñapay tikipal tek tikak. Pen bin ne ned ak ñapay wom midil, God Eblaham nop ñi olap tikiñigaban agil takaw aglak tek, ñi ak tikak.

24-25 Pen kesim jii anib ak, takaw yipil won oginap sek mideb. Bin wog giñeb Haga nim, Mosis takaw tek ak. Ned God takaw agak ak, Mosis nop ñak dum Saynay. Dum anib ak, man Alebiya mideb. Jelusalem abe miñil mideb ak, dum Saynay tek lup. Bin anib ak, ne tap anib okok gup tek ak mideb. Anib ak, Juda kili pelnep Mosis takaw apal ak nim, Haga ñapay ne okok bi wog giñeb yokip okok tek midebal.

26 Pen chin bin Haga kid ak nib ma midobun. Ami chin nim, Jelusalem anib ak ke God man ne alañ nib ak. Ñapay ne okok bi wog giñeb yokip okok tek mel.

27 Anib ak tek, buk Baybol tikil agilak, Bin ñapay ma tikup, nab nop pi ak yul ma gup, miñmiñ yibil gil midtep ginimun agil tikilak. Ñapay ne ak kuñay yibil yenigabal agil tikilak. Pen bin nigimil ayip ajoligup ak ñapay tikek, ñapay kuñay ma yenigabal agil tikilak.

28 Mam ay sikop. God Eblaham nop, bin nad

4:22 Stt 16.15, 21.2 4:23 Stt 18.10-14, Lom 9.7-9, Hib 11.11

4:24-25 Lom 8.15, Gal 5.1 4:26 Hib 12.22, Lep 3.12, 21.2, 21.10

4:27 Ais 54.1 4:28 Apo 3.25, Lom 9.7-8, Gal 3.29

ke yibil ak ñapay olap tikiñigab aglak. Aglek, gos anib ak nig midel, ñine Aysak nop tikak. Anib ak tek, God chinop dinigayn aglek, gos anib ak nep nig midon, chinop dek God ñapay ne midobun.

²⁹ Ned ñin anib ak, Eblaham ñine binib ñapay tikipal tek bin wog giñeb ak tikak. Ñi anib ak tikjakil, nimam adik nop gi timel gak. Nimam adik anib ak, God Kawnan kiles ne ak Eblaham ñek tikak ak. Anib ak tek, miñil abe tap timel gipal anib ak anigil nep mideb.

³⁰ Pen buk Baybol ak tikil agilak, Bin wog giñeb amilminal ak kilop agyokinimin agil tikilak. Bin nak ke yibil dil ñi tikiñak ak, tap ne okok, ñi nak olap tap anib okok ma dinigab agil tikilak.

³¹ Anib ak mam sikop nigim. Chin bin yokip apil wog giñeb yek ak ñapay ne tek ma midobun. Eblaham bin ne ke yibil dil ñapay tikak tek ak midobun.

5

Jisas apil chinop gek, chin nag lup ak wisibil midtep gipun

¹ Ned chinop nag lek tek yoligipun. Pen Jisas apil chinop gek, chin nag lup anib ak wisibil midtep gipun. Anib ak tek, nibi kiles timel yibil yenimib, takaw Mosis ñu kil tikak ak ma niginimib. Bi oginap pen gel bi wog giñeb kili tek ma yenimib.

² Yad Pol nibop agebin, God binib ne yonigun agil, Juda kay takaw ak dil wak tibilikenigabim, Klays nibop ma dinimuj tek linigab.

4:29 Stt 21.9, Gal 5.11, 6.12 **4:30** Stt 21.10, Jon 8.35 **4:31** Jon 8.36, Gal 3.29, 5.1, 5.13 **5:1** Jon 8.32, 8.36, Apo 15.10, Lom 6.18, Gal 2.4, 5.13, 1 Pi 2.16

3 Yad nibop tepayan agtep ginigebin, wak tibilikkep adek anib ak kidek ginig, Mosis takaw ak midupsek agak tek ginimib.

4 Nibi binib Mosis takaw ak kidek gon, God chinop nigeek binib suntep ne midobun agil nepim okok, Klays nop keligil apyap pakipim. Gos anigil nepim tek, nibop yimug ninid gitep ginimun tek ma lup.

5 Pen chin binib God nop gos linigon, Kawnan ne ak chinop bak lup okok, suntep yibil yonigabun agil, tep gahnin kod midobun.

6 Binib Klays Jisas nop chigipal okok, wak tibilikilak akan ma tibilikilak ak, takaw ma mideb. Pen Klays nop gos linid, binib okok kilop mapen linigabal ak, tep yibil.

7 Ned aj tep geligipim. Miñil pen an nibop agek, takaw telep ak keligil, takaw yepis apal ak nepim?

8 Takaw anib ak, God yil ma owup. Ne ke nim nibop suk agek, takaw telep ak miñil ninid debim.

9 Tap yis ak, sikol bad oginap bilet sek lil dagilek, yin tanub. Tap yis anib ak, takaw pal adan lil agebin. Takaw yepis apal ak, tap yis tek mideb.

10 Yad nepin, Klays nop chigil jimñil midobun ak nim, gos yip ninid kidek ginigabim ak, gos olap ma niginigabim. Pen bi an apil agek, gos ak gos ak nigezim ak, God bi anib ak nop gi timel ginigab.

11 Pen mam ay sikop nigim. Yip gi timel gilig nep

5:3 Gal 3.10 5:4 Lom 9.31-32, Hib 12.15 5:5 Lom 8.24-25, 2 Ti 4.8 5:6 1 Ko 7.19, Gal 6.15, Kol 3.11, Jem 2.18-22 5:7 1 Ko 9.24, Gal 1.6, 3.1 5:9 1 Ko 5.6, 15.33 5:10 2 Ko 2.3, 8.22, 10.6, 11.15, Gal 1.7 5:11 1 Ko 1.23, 15.30, Gal 6.12, 6.17

midebal ak, Jisas takaw anep agen yip anigipal. Pen Jisas mab bak alan kumak takaw ak agñilig, wak tibilikep takaw ak sek apinep ak, yip gi timel ma gipilap.

¹² Pen bi nibop wak tibilikinimib agil, takaw yilik apal anib okok, wak kilop ak midupsek tibilik yokipilap ak tep.

¹³ Pen mam sikop. God nibop suk agek, nibi nag lup ak keligil, midtep gipim. Pen gos nibi anib agil, gos oginap sek ma niginimib. Tap nedil ma gebim ak, tepayan gun agil ma ginimib. Binib Klays ayip chigil midebim okok, penpen wog giñilig yenimib. Anigil penpen mapen lil, ditep ginimib.

¹⁴ Takaw Mosis ñu kil tikak ak, midupsek di jimñil takaw won nokom olap agil agak, Nibi ke mapen lipim tek, binib oginap kilop abe mapen linimib agak.

¹⁵ Anib ak, nibi nigtep ginimib. Chen chag okok milik yapek penpen gipal tek, nibi penpen genigabim, midupsek apyap pakinigabim.

Gos ke nepim adek ak keligil, God Kawnan ne ak gos ñub tek ginimib

¹⁶ Anib ak nibop apin, God Kawnan ne ak gos ñub adek ak nep ginimib. Anigem, gos nibi ke niñid tap si tap timel geligipim adek ak keliginigabim.

¹⁷ Gos omiñal anib ak, gos nibi ke pis olap lipig dad amñigab, God Kawnan ne ak pis olap lipig dad amñigab ak nim, ginigun agil niginigabim adek ak, ginimib tek ma linigab.

5:13 1 Ko 8.9, 9.19, 1 Pi 2.16, 2 Pi 2.16-19 **5:14** Wkp 19.18, Mat 5.43, 7.12, Lom 13.8-9, Jem 2.8 **5:16** Lom 6.12, 8.4, 13.14, Gal 5.25, 1 Pi 2.11 **5:17** Lom 7.15-23, 8.6-7, 1 Pi 2.11

18 Pen God Kawnan ne ak kidek gem amek, takaw Mosis ñu kil tikak ak kidek ma gipim.

19 Nib nepim, binib mubwak gos nab ayan nedil ak kidek gipal okok, kili anigil gipal. Bin si bi si dil, tap timel gil gach sek midil, chibol kilop tikjakil tap timel gach ak gil,

20 tap yepis agnigep okok agnijid, kuj gil, penpen gil, milik nijid, chibol timel gil, gos timel nijid, yad ke biawl miden agil, takaw penpen agil, tig asik keke lil, midtep ma gipal.

21 Tap kili kunay okok yad tek midobikop agil nijid, ñig kiles ñibil sawl lil, tap nigep ma nigep gil, tap timel yibil anib okok kunay yibil nep gipal. Yad nibop takaw aginek ak, miñil tepayan nibop agebin. Binib anib ak tek gi midebal okok, God kilop dil ma kod yenigab.

22 Binib pen God Kawnan ne ak kilop gos ñaknij gel amub okok, kili anigil gipal. Binib kilop mapen lil, miñmiñ yibil gil, kimigel jimñil midil, binib oginap kilop timel gel pen milik ma nijid, yimug nijid, tap gitep gil, apal tek nijid kidek gil,

23 binib ayip kimigel midil, takaw sayn tep agil gos nigtep gipal. Gipal anib ak, taynen anigipim agil, agnigel tek ma mideb.

24 Binib Klays Jisas nop chigipal okok, gos ke nijid monmon geligipal adek ak keligipal. Tap nedil goligipun adek anib ak, Klays ayip kumeb agil, Klays gos ñub tek nep gipal.

5:18 Lom 6.14, 8.2, 8.14 **5:19** 1 Ko 3.3, 6.9-10, Epe 5.3, Kol 3.5, Jem 3.14-15 **5:21** 1 Ko 6.9, Epe 5.5, Kol 3.6, Lep 22.15 **5:22** 1 Ko 13.7, Epe 5.9, Kol 3.12, Jem 3.17 **5:23** 1 Ti 1.9 **5:24** Lom 6.6, 13.4, Kol 3.5, 1 Pi 2.11

²⁵ Anib ak God Kawnan ne anep gek, binib ne midobun ak, tap titay ginig chinop gos ñakniñ nep ginigun.

²⁶ Pen chin ke yib awl miden agil, yib chin dad aplanilig, penpen milik ma niginigun.

6

Penpen ditep ginimib

¹ Mam ay sikop. Binib nibi olap tap timel adek oginap gonimuj, nibi binib God Kawnan ne ak gos ñek kidek gipim okok, nop takaw saynsayn agil, agtep gem, tepayan midtep ginimuj. Pen chin abe timel ginigun tek lup agil nigtep ginimib.

² Anib ak binib nibi oginap miñel gonimuj, kilop yimug niñid kod midem, midtep ginigel. Ginigabim anib ak, Klays ne binib kilop mapen nigup ak, agak tek ginigabim.

³ Pen bi olap, yad biawl midebin agup ak pen yib ne ma mideb, bi anib ak ne ke takaw yepis yibil agup.

⁴ Binib okok nokom nokom wog kili keke bilok niginigel, tep mideb akan mel. Bi aniginimuj ak, yad gitep gebin agil miñmiñ ginimuj. Ne ginimuj anib ak tek, bi oginap ginigel ak ma bilok niginimuj.

⁵ Taynen? Chin nokom nokom miñel keke mideb tek niñid, titay gil midtep ginigabun ak, ke nigtep ginigun.

5:25 Lom 8.4-5, Gal 5.16 **5:26** Plp 2.3 **6:1** Mat 18.15, 1 Ko 2.15, 4.21, 7.5, 2 Ti 2.25, Hib 12.13, Jem 5.19 **6:2** Jon 13.14-15, Lom 15.1, 1 Te 5.14, 1 Jo 4.21 **6:3** Lom 12.3, 1 Ko 8.2, 2 Ko 3.5 **6:4** 1 Ko 11.28, 2 Ko 13.5 **6:5** Lom 2.6, 14.12, 1 Ko 3.8

6 Pen binib God takaw agñibal okok, binib agñel nepal okok kili kilop sawl ma ginigel, tap midonimuj okok, kilop oginap bilok ñinigel.

7 Pen God bi sawl sek agil, nop monmon ma ginimib. Nibi takaw yepis nep agil, God nop anigil agep tek ma mideb. Nib nepim, tap yin yimnigabim ak nep jakinigab, tap olap ke ma jakinigab.

8 Anib ak bi olap gos ne ke nigup tek ginigayn aginigab ak, tap timel pipaginig amil pisnep timel ginigab. Pen God Kawnan ne ak gos ñub tek ginigayn aginigab ak, tap telep din agil gos nigek God Kawnan ne ak nop ñek, pel pelnep yenigab.

9 Anib ak yilik gek ma keliginigun, gitep yibil ginigun. Kiles gil gi yimil, ñineb ñin ak, tep gaknin nep ñiniginigabun.

10 Pen tap ñineb anib ak wos ma gup ñin awl, binib Klays yil midebal okok chin kilop kiles gil gitep ginigun. Pen binib yokip okok abe gitep ginigun.

Klays chinop agil mab bak alaj kumak tek, Pol miñmiñ gup

11 Yad agen, mam olap mij awl ñu kil tikup. Pen miñil ñin midup yad ke tikebin ak nim, midup awl tek tikebin.

12 Bi okok kili nibop takaw kiles wak tibilikinimib apal okok, chin anigil bi oginap widin midup adek sinjak yib awl dun agil gipal. Kili

6:6 Lom 15.27, 1 Ko 9.11, 9.14 6:7 Jop 13.9, Luk 16.25, Lom 2.6, 1 Ko 6.9 6:8 Hos 8.7, 10.12, Jon 3.6, 6.63, Lom 8.13, Jem 3.18 6:9 1 Ko 15.58, 2 Te 3.13, Hib 3.6, 3.14, Lep 2.10 6:10 Epe 2.19, 1 Te 5.15, 1 Ti 6.18, Hib 3.6 6:12 Gal 2.3, 2.14, 5.11, Plp 3.18

pilikil gos anigil nepal, Juda bi oginap Klays mab bak alan kumak takaw ak dipun tek, chinop gi timel ginigel agil nepal. Anib ak kili nibop wak tibilikinimib apal.

¹³ Wak kili ke tibilikipal ak pen, takaw Mosis ñu kil tikak okok midupsek kidek ma gipal. Pen nibop wak tibilikinimib apal ak, kili ke yib awl dil, miñmiñ gun agil apal.

¹⁴ Pen yad ke yib yad ak ma dad aplanigayn. Biawl chin Jisas Klays ayip agil mab bak alan kumek, yad ayip kumnek tek lup ak agil, miñmiñ gil yib nop nokom dad aplanigayn. Ne ayip kumnek anib ak, bi pisnep kumeb tek ak miden, tap lum awl yil ak yip gos ma gup. Binib lum awl yil okok yip pen nigel, tap yokip olap tek lek, bi pisnep kumeb tek ak midebin.

¹⁵ Chin wak tibilikinok akan, ma tibilikinok ak, takaw ma mideb. God gek binib konim kideyil lil, binib ne midobun ak, tap awl yibil.

¹⁶ Binib gos anib ak kidek gil, Klays yil midebal okok, God ne kilop mapen ninid kod midek, midtep ginigel. Binib anib okok, Yislel binib God binib ne yibil midebal.

¹⁷ Yad takaw won nokom olap mideb ak, nibop aginigebin. Jisas takaw telep ak agen, yip pakipal soy midup okok mideb, anib ak tek ne God wog ak gitep gup akan, gitep ma gup agil yip ma aginigel.

¹⁸ Mam ay yad okok. Biawl chin Jisas Klays ne nibop yimug ninid gitep ginimun. Yaw.

Jisas Klays Takaw Teplep Ne Tay New Testament

copyright © 2013 Pioneer Bible Translators

Language: Tay (Tai)

Translation by: Pioneer Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-06-21

PDF generated using Haiola and XeLaTeX on 28 Dec 2024 from source files dated 29 Jan 2022

24d09cce-9a93-523a-afa5-7b091c264cee